

Buku Where Did I Come From Akan Diharam Jika Terbukti Ada Elemen Mudaratkan Moral
Bername
21 Februari , 2012

KUALA LUMPUR, 21 Feb (Bernama) -- Kementerian Dalam Negeri (KDN) akan mengenakan perintah larangan serta mengharamkan buku Where Did I Come From tulisan Peter Mayle jika terbukti ia mengandungi elemen memudaratkan moral masyarakat dan menggemparkan fikiran orang ramai.

Timbalan Ketua Setiausaha (Keselamatan) KDN Datuk Abdul Rahim Mohd Radzi berkata tindakan itu akan diambil di bawah peruntukan Seksyen 7 Subseksyen 1 Akta Mesin Cetak dan Penerbitan 1984.

"Pada masa yang sama, untuk meredakan bantahan orang ramai terhadap isu ini, KDN telah mendapatkan kerjasama premis buku seluruh negara untuk menghentikan sementara jualan buku itu serta merta sehingga kajian selesai dan keputusan terhadapnya dibuat," katanya dalam kenyataan di sini Selasa.

Beliau berkata jika kandungannya didapati menyalahi peraturan Seksyen 7 Subseksyen 1 Akta Mesin Cetak dan Penerbitan 1984, arahan untuk menghentikan jualannya akan dikeluarkan dan pengedar yang didapati masih mengimport serta menjualnya boleh didakwa mengikut Seksyen 8 Subseksyen 2 akta yang sama.

"Jika sabit kesalahan boleh dikenakan hukuman penjara tidak lebih tiga tahun atau denda tidak lebih RM20,000 atau kedua-duanya," katanya.

---BERNAMA

Hakcipta © 2012 BERNAMA

Source:<http://www.bernama.com/bernama/v6/bm/newsindex.php?id=647049>